

03/02/2003

Gerakan tawan semula negeri bermula

JELI: Umno Kelantan di semua peringkat akan melancarkan gerakan menawan semula Kelantan, sekali gus menumbangkan kerajaan Pas di negeri ini pada pilihan raya umum akan datang.

Sehubungan itu, Pengerusi Badan Perhubungan Umno negeri, Datuk Mustapa Mohamed, berkata perubahan yang sudah bermula di Parlimen Jeli menguatkan semangat Umno dan Barisan Nasional (BN) Kelantan menawan semula negeri itu.

Katanya, rakyat juga mula menyedari mereka selama ini dipermainkan dan diperalatkan Pas semata-mata untuk meneruskan cengkaman kuasa politik, tetapi tidak membawa sebarang perubahan.

"Perubahan (politik) di Jeli kini menjadi landasan kepada rakyat untuk terus berjuang sehingga mencapai matlamat (kemenangan).

"Janji saya untuk menyelamatkan negeri ini dan rakyat daripada terus berada dalam kemunduran di bawah kerajaan Pas," katanya berucap pada majlis perjumpaan bersama Ketua-ketua Penyelia Pembangunan Mukim (KPM) dan Penyelia Pembangunan Mukim (PPM) Parlimen Jeli, dekat sini, semalam.

Mustapa, yang juga Pengarah Eksekutif Majlis Tindakan Ekonomi Negara (MTEN) berkata bukti perubahan bermula di Jeli berdasarkan kehadiran begitu ramai rakyat ketika lawatan Perdana Menteri, Datuk Seri Dr Mahathir Mohamad, ke Parlimen itu pertengahan bulan lalu.

Katanya, Kelantan memerlukan kerajaan yang cekap pentadbiran dalam menghadapi cabaran alaf baru bersifat global. Oleh itu rakyat perlu membuat pilihan bijak dalam menentukan kerajaan negeri pada pilihan raya umum akan datang.

"Ahli parti dan rakyat di semua peringkat perlu hidupkan semangat untuk menawan Kelantan dan mencapai kemenangan.

"Kita juga akan memasang sepanduk bertulis slogan `Perubahan Sudah Bermula' di merata tempat seluruh bahagian ini mulai sekarang," katanya.